

Gajah miliki keupayaan faham konsep kematian, ingat kawasan

Kuala Lumpur: Gajah ialah haiwan yang menakjubkan kerana mempunyai keupayaan spatial (ruangan), termasuk boleh mengingat sesuatu kawasan, walaupun sudah melaluinya untuk tempoh lama.

Pensyarah Kanan Fakulti Perhutanan dan Alam Sekitar Universiti Putra Malaysia (UPM), Dr Jamhuri Jamaluddin, berkata dengan keupayaan berkenaan, gajah boleh mengingat jalan dilaluinya meskipun haiwan itu dipindahkan ke suatu kawasan lain lebih jauh.

Sehubungan itu, beliau yang kini melakukan penyelidikan di bawah Jabatan Perlindungan Hidupan Liar dan Taman Negara (PERHILITAN) bertajuk 'Pemantauan Pergerakan dan Analisis Gajah', tidak menolak kemungkinan ibu gajah anaknya mati dilanggar lori di Gerik, Perak pada Ahad lalu boleh kembali ke tempat kejadian.

"Gajah mempunyai *spatial memory*, termasuk boleh mengingat kawasan dan faham konsep kematian. Ia boleh kunci kawasan itu dan boleh kembali untuk melawat. Itulah kelebihan naluri gajah dan sains pun belum dapat buktikan bagaimana ia boleh mengingat," katanya.

Selain itu, Jamhuri berkata, gajah ialah haiwan mamalia yang mempamerkan tingkah laku sosial mengagumkan dengan membina hubungan emosional yang kuat bersama ahli kumpulan.

"Kecerdasan emosi gajah bukan mitos kerana haiwan ini faham konsep kematian dan tahu keberadaan ahli keluarga yang mati dan kadang kala haiwan itu kembali ke tempat sama walaupun yang tinggal cuma rangka," katanya.

Beliau berkata, hubungan dalam kalangan gajah bukan sekadar biologi, tetapi bersifat sosial dan emosi sehinggakan ibu gajah akan menjaga anak selama bertahun-tahun. BERNAMA

“Gajah boleh
mengingati jalan
dilaluinya meskipun
haiwan itu dipindahkan
ke suatu kawasan lain
lebih jauh”



**Jamhuri
Jamaluddin,**
Pensyarah Kanan
Fakulti Perhutanan
dan Alam Sekitar
UPM

